

無邪集 ■ 陳慶煌

瀛苑副刊

評教育部文藝獎後有感四首

盛哉詩教關邦政，邛治相期大有為。下筆琳瑯空百代，鈞陶萬祕意何奇？

四海珊瑚儘網羅，因緣相契意如何？無邪當繼詩三百，鼓吹休明不在多！

祖宗祧唐貴合宜，溫柔敦厚自家知。詩人第一無邪思，忠愛存心句便奇！

禮義於詩猶甲冑，更需廉恥化干戈。鍼頑立懦吾儕事，日月同光發浩歌！

評教育部主辦心靈改革全國徵文比賽後感賦二首

身教倡行家愷悌，聖門不忘敦詩禮。天生赤子本無邪，改革可曾知大體？

議場到處是明星，各領風騷亂視聽。民族幼苗誰愛惜？憑詩淨化小心靈！

赴中山大學評西子灣文學獎後書勉獲雋諸生

陶謝風流共一家，君當惜此好年華。斯文蔚起吾殷盼，桃李逢春猛著花！

赴成功大學評鳳凰樹文學獎口占一首

夾道鳳凰花怒放，衡文有幸到鯤身。斯庵（沈光文）已渺
流風在，大雅輪扶一代新。

五十初度感賦

我游斯世若虛舟，學海沉浮不識愁。天命清狂憐杜李，心
儀小令等姜周。豈甘留白消長晝，剩欲飛黃看九州，放浪
形骸難免俗，半生吟詠荷恩休。（領聯指牧之、玉溪、白
石、清真四大家）

遣興

渾然全我性中天，俯仰隨心樂歲年。雨霽樓頭橫翠靄，風
來松下響清絃。密移造化詩能詠，善體陰陽法可蠲。況有
鳴禽欣喚客，看雲欹枕作龍眠。

鵲橋仙 < 題關渡宮凌霄寶殿 >

靈山峻極，去天咫尺，俯瞰淡江澄碧。凌霄宮闕貌巍峨，
論佳勝、吾臺第一。花晨月夕，都人遊息，共仰神其來格。
。此生有幸蒞於斯，永恩沐、堯天舜日。

（編按：本文作者為本校中文系教授）